



*Jonas ayant annoncé aux Niniuites la parole & menace de Dieu, ils se conuertissent, & font penitence, implorans sa misericorde.*



**V**AND Ionas eut annoncé aux habitans de la grande Niniue les menaces du Seigneur, & comme iustement il estoit indigné contre eux à cause de leurs pechez & offenses : Les hommes de ladite ville creurent au Seigneur, publierent le ieusne, & eurent recours à la penitence, & prindrent le sac, la haire & le cilice, depuis le plus grand iusques au plus petit. Aussi la parole de Ionas vint iusques au Roy de Niniue, lequel se leua de son thrône, & ietta hors de dessus soy son vestement, & se vestit d'un sac, & s'assit sur la cendre. Puis il fut crié, & dit en Niniue de la bouche du Roy, & de ses Princes, Que les hommes, & les iumens, & les bœufs, & les bestes ne goustent rien, & qu'ils soient sans paistre & sans boire ; & que les hommes & les bestes soient couverts de sacs, & qu'ils crient au Seigneur à force, & que l'homme se conuertisse de sa mauuaise voye, & de l'iniquité qui est entre ses mains. Qui sçait si Dieu se conuertira, & s'il pardonnera, & s'il n'appaisera point sa fureur & son ire, à ce que nous ne perissions point ? Et le Seigneur eut pitié d'eux ; & le mal qu'il auoit proposé de leur faire, il ne leur fit pas.